

壹 考察經過

第一章 焉耆

焉耆爲古國名，首見記載於前漢書西域傳稱：「焉耆國王治員渠城，南至尉犁百里，近海水多魚」。後漢書西域傳稱：「焉耆王居南河城（後漢紀作河南城），四面有大山，與龜茲相聯，道險阨、易守。有海水，出入四山之內，週匝其城，三十餘里」。由於古書所載形勢，證以今地，現喀拉沙爾之北、西兩面爲天山，爲海都河發源及匯流之地。南、東兩面爲庫魯克山，古稱南山即沙山，水經注所云：「敦薨之水……又西出沙山鐵關谷」是也。中有博斯騰淖爾，亦稱巴勒喀斯湖，水經注稱爲「敦薨之藪」，亦稱爲「西海」，爲海都河尾閘。海都河發源於汗騰格里山，東流逕流焉耆之野，至縣城之東南，而入博斯騰淖爾。淖爾南、東兩面均濱庫魯克山，沙磧縱橫，北、西爲天山，距海岸較遠，中間隆起廣大平原，海都河流貫其中，古之焉耆、危須、尉犁皆生息於此大平原也。據漢書西域傳：「危須西至焉耆百里，焉耆南至尉犁百里」。是危須在焉耆之東，尉犁在焉耆之南，如以曲惠爲古危須國地，曲惠之舊城爲其治所，則古危須國是據海北面平野。如以哈拉木登爲古焉耆國地，其舊城即古員渠城遺址，則海之西北面大平原爲焉耆國區域。如以四十里城市一帶之遺址爲古尉犁國地，則海之西南面平原爲尉犁國地矣（參考本章頁五—七）。至魏晉以後，焉耆王強盛，併有危須、尉犁兩國地。晉張駿遣沙州刺史楊宜，疆理西域，以張植爲前鋒，植擊敗龍熙於遮留谷，進據尉犁（晉書四夷傳焉耆條）。遮留谷即今哈滿溝，植從南來，過哈滿溝進據尉犁，是尉犁已爲焉耆之一縣，而焉耆西境直至庫爾勒而與龜茲接壤矣。魏太平眞君七年，魏太武帝遣萬度歸討焉耆，破左回、尉犁二城，進圍員渠。左回即曲惠，古危須國地。是在北魏時，危須、尉犁已爲焉耆之二城，故焉耆東境，當至榆樹溝（喀刺和色驛）而與高昌交界，西南出鐵關谷至庫爾勒而與龜茲接壤矣。晉釋法顯至焉耆由南來，唐釋玄奘至焉耆由東來，即由高昌來，均未提及危須、尉犁，則此二國早已併入焉耆矣。西州圖經殘卷稱：「銀山道出天山縣界，西南向焉耆國七百里」，即此地也。唐貞觀間滅高昌，改爲西州，焉耆遂與唐接壤，爲唐通西域之橋頭，故在唐上元二年，置焉耆都督府以備四鎮。唐末回鶻入新疆，焉耆亦相繼屬於回鶻，與中國關係遂

